

PARLIMEN MALAYSIA
PEMBERITAHU PERTANYAAN DEWAN RAKYAT

- PERTANYAAN** : **LISAN**
DARIPADA : **DATUK SAPAWI BIN AHMAD WASALI [SIPITANG]**
TARIKH : **25 MAC 2014 (SELASA)**
SOALAN : **Datuk Sapawi bin Ahmad Wasali [Sipitang]** minta **MENTERI PERTANIAN DAN INDUSTRI ASAS TANI** menyatakan keberhasilan usaha setakat ini untuk menangani kegiatan orang tengah yang mengaut keuntungan daripada titik peluh sektor pertanian, perladangan dan perikanan.
- JAWAPAN OLEH** : **YB. MENTERI PERTANIAN DAN INDUSTRI ASAS TANI**

Tuan Yang Dipertua,

Kerajaan menyedari bahawa peranan orang tengah tidak boleh dinafikan dan wajar dihargai, namun bilangannya perlu diminimakan dan dikawal bagi mengelakkan manipulasi secara berleluasa terhadap pengeluar dan pengguna, khususnya para petani dan nelayan. Dalam hal ini, peranan orang tengah dapat dikurangkan sekiranya kita dapat memendekkan rantai nilai dengan memastikan lapisan atau *tier* pemasaran dikurangkan seterusnya menguasai setiap peringkat rantai nilai dari pengeluar, pengedar dan pemasar hasil pertanian iaitu dari ladang hingga ke pengguna.

Dalam hal ini Kerajaan telah mengenal pasti beberapa strategi utama dalam mengatasi permasalahan monopoli atau manipulasi orang tengah iaitu:

- meningkatkan pengeluaran bekalan agromakanan utama seperti ikan, sayuran, buah-buahan, ayam, dan daging;
- memendekkan rantai nilai seperti memperkukuh dan memantapkan saluran pemasaran sedia ada;
- mewujudkan saluran pemasaran yang baharu;

- meningkatkan *market share* (dengan izin) pasaran produk agromakanan oleh agensi pemasaran seperti FAMA, LKIM dan LPP; dan
- menambahbaik skim, bantuan, kemudahan, dan program sokongan sedia ada untuk pengeluar.

Tuan Yang Dipertua,

Program jihad memerangi orang tengah dilancarkan secara berperingkat-peringkat. Bagi subsektor padi, majlis pelancarannya telah diadakan pada 16 Januari 2014 di Kota Baharu, Kelantan.

Sebanyak empat (4) strategi untuk subsektor padi yang dilaksanakan iaitu:

- (i) Menggerakkan Pertubuhan Peladang Kawasan (PPK) sebagai badan pengurusan bagi pembelian padi dari pesawah terus ke kilang melalui Pusat Belian Padi (PBP). Jumlah penglibatan petani dalam urusan beli padi melalui PPK (70% daripada jumlah keseluruhan petani iaitu 71,345 orang pesawah akan terlibat. Sebanyak 8 buah PBP dijangka akan disiapkan pada tahun 2014;
- (ii) Penyeragaman harga padi di Semenanjung pada kadar: RM1,200/mt (tertakluk kepada mutu sebenar padi). Pelaksanaan pemutuan sebenar padi di PBP yang melibatkan PPK, petani, BERNAS dan juga di kilang padi swasta. Manakala pemindahan padi antara negeri dibenarkan tertakluk kepada pengeluaran permit oleh Seksyen Kawal Selia Padi dan Beras (KPB). Buat masa ini beberapa siri penerangan berhubung dengan pemutuan sebenar padi dan penyeragaman harga telah dilaksanakan di semua peringkat;
- (iii) Dana Kebajikan Petani yang diuruskan oleh setiap PPK dengan modal pusingan sebanyak RM100,000.00 kepada setiap PPK. Majlis penyerahan dana kepada PPK dijangka akan diadakan pada 22 Mac 2014 di PPK Beseri Perlis;

(iv) memantapkan pengagihan beras subsidi ST15 dengan perkara-perkara berikut:

- pengagihan dilaksanakan di PBP /PPK/ Kilang Beras BERNAS;
- pelabelan - Kampit beras ST15 perlu dilabel dengan “Kegunaan Isi Rumah Warganegara Malaysia Sahaja” dan pembelian dihadkan dua (2) kampit untuk satu keluarga;
- dipasarkan di kedai-kedai seperti berikut:
- Kedai Agro bazar, Kedai KRIM, Kedai TUKAR, PERNAMA, Kedai Peladang dan sebagainya;
- penjualan di hypermarket akan dihentikan; dan
- dilaksanakan bermula pada 1 April 2014.

Majlis pelancaran jihad memerangi orang tengah dalam sub-sektor perikanan telah diadakan pada 9 Februari 2014 di Kuantan, Pahang.

Sebanyak 8 strategi utama yang akan dilaksanakan iaitu:

- (i) Persatuan Nelayan Kebangsaan (NEKMAT) akan memainkan peranan untuk membeli terus hasil tangkapan nelayan dengan menawarkan harga setanding dengan yang ditawarkan oleh orang tengah. Sehingga ini sebanyak RM 12 Juta telah diterima oleh NEKMAT untuk membeli terus dan menjual hasil tangkapan nelayan;
- (ii) mengambil alih hutang nelayan sebanyak RM40 juta daripada orang tengah menerusi Tabung Ekonomi Kumpulan Usaha Niaga (TEKUN) Nasional. Buat masa ini TEKUN sedang memperhalusi mekanisma pelaksanaan dan dijangka program akan dapat dilaksanakan penghujung Mac 2014;
- (iii) menyediakan tabung pinjaman tanpa faedah untuk kecemasan sebanyak RM50,000 kepada 87 Persatuan Nelayan Kawasan termasuk Sabah dan Sarawak menerusi NEKMAT. Mekanisma pelaksanaan sedang disediakan oleh LKIM;
- (iv) menyediakan tabung pinjaman mudah menerusi TEKUN Nasional bagi membeli bot ataupun sampan serta peralatan penangkapan;

- (v) menambah 50 pasar nelayan baharu di seluruh negara bagi membolehkan nelayan atau keluarga memasarkan terus hasil jualan. Tapak-tapak telah dikenal pasti dan sedang dalam proses mendapatkan kebenaran menduduki oleh Kerajaan Negeri;
- (vi) nelayan menjual terus hasil tangkapan mereka kepada NEKMAT untuk tujuan sejuk beku yang akan dipasarkan melalui outlet Program Ikan Rakyat. Sebanyak 112 outlet Ikan Rakyat telah beroperasi di seluruh negara. Lokasi outlet baru akan dikenal pasti;
- (vii) mewujudkan lebih banyak pusat pengumpulan (CC) dan pusat pengedaran (DC). Lokasi CC dan DC yang baru sedang dikenal pasti; dan
- (viii) menyediakan lebih banyak tapak niaga di pasar tani dan konsep jualan terus secara *Fish-On-Wheel*. Sehingga kini sebanyak 258 daripada 517 pasar tani telah disertai oleh NEKMAT/ Persatuan Nelayan Negeri/ Persatuan Nelayan Kawasan dan terdapat 4 buah motosikal roda tiga sedang diusahakan oleh Persatuan Nelayan Kuantan.

Berhubung dengan keberkesanan program jihad orang tengah ini, walaupun inisiatif masih baru dilancarkan namun impaknya telah mula dirasakan. Bagi subsektor padi, para petani telah mendapat faedah berikutan penyelarasan harga padi dan sebagai contoh, musim tuaian pertama bagi pesawah di Rompin dan di Pasir Puteh, mereka telah menghantar padi untuk proses melalui PPK. Bagi subsektor perikanan, NEKMAT dan Persatuan Nelayan membeli terus hasil tangkapan daripada nelayan dan menjualnya di pasar-pasar tani kendalian FAMA.

PARLIMEN MALAYSIA
PEMBERITAHU PERTANYAAN DEWAN RAKYAT

- PERTANYAAN** : LISAN
DARIPADA : TUAN LIM KIT SIANG [GELANG PATAH]
TARIKH : 25 MAC 2014 (SELASA)
SOALAN : Tuan Lim Kit Siang [Gelang Patah] minta **MENTERI SUMBER ASLI DAN ALAM SEKITAR** menyatakan menyatakan sebab sebab kematian ikan berkelompok yang berlaku di perairan Tanjung Kupang sepanjang Selat Johor dalam bulan Februari, dan tindakan yang diambil untuk melindungi 250 orang nelayan, 10 ladang ikan serta sistem-ekologi di sekitar kawasan berkenaan.
JAWAPAN OLEH : YB. MENTERI PERTANIAN DAN INDUSTRI ASAS TANI

Tuan Yang Dipertua,

Kementerian Pertanian dan Industri Asas Tani melalui Jabatan Perikanan telah membuat kajian berikutan kematian ikan yang dialami oleh penternak di perairan Tanjung Kupang, Johor. Kajian tersebut menunjukkan kematian ikan tersebut adalah disebabkan oleh plankton dari jenis *dinoflagellate*. Sampel air yang dianalisa oleh Universiti Malaya dan Universiti Kebangsaan Malaysia telah menemui *dinoflagellate kalodinum veneficum* dan *kalodinum micrum* pada kepadatan tinggi iaitu melebihi sejuta/liter air. Kedua-dua *dinoflagellates* tersebut adalah toksik kepada ikan kerana boleh menyebabkan paras oksigen di dalam air menjadi rendah.

Pihak Jabatan Perikanan juga melakukan pemantauan berkala kualiti air dan ikan melalui program *National Shellfish Sanitation Programme (NSSP)* dan *Sanitary and Phytosanitary*. Di samping itu, Jabatan turut mengenalpasti kawasan-kawasan yang sesuai untuk ternakan ikan dalam sangkar. Pemantauan dan pematuhan terhadap NSSP oleh penternak di sangkar ternakan masing - masing juga amat perlu memandangkan populasi *dinoflagelat* adalah bergantung kepada keadaan suhu,

saliniti (kemasinan air bagi air laut), nutrien, cahaya dan kedalaman pada satu-satu kawasan.

Selain itu, pada 11 Februari 2014 Jabatan Alam Sekitar (JAS) turut telah menjalankan pemantauan dan mendapati tidak terdapat kawasan perindustrian dan kesan tumpahan minyak di sekitar kawasan ternakan ikan di Tanjung Kupang. Jabatan Alam Sekitar (JAS) turut menjalankan pemantauan kualiti air laut di kawasan Tanjung Kupang yang dijalankan sebanyak 3 kali setahun bagi mengesan dan memantau sebarang perubahan kepada kualiti air di kawasan berkenaan. Berdasarkan pemantauan kualiti air yang dilakukan di stesen pengawasan air laut Tanjung Kupang, pada tahun 2013 didapati kualiti air laut berada pada kategori baik.